



Broj: 01-50-1-15-22/07
Sarajevo, 20. 2. 2008. godine

Z A P I S N I K
22. sjednice Predstavničkog doma
Parlamentarne skupštine Bosne i Hercegovine,
održane 20. 2. 2008. godine

Sjednica je počela u 11,20 sati. Prisustvovao je 41 poslanik. Odsustvo je opravdao Sefer Halilović. Iz Vijeća ministara BiH sjednici su prisustvovali predsjedavajući i svi ministri i zamjenici.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, američke i rumunske ambasade, NATO-a, EUPM-a, te nevladinih organizacija Centara civilnih inicijativa i Nacionalnog demokratskog instituta.

U okviru prethodnog pitanja predsjedavajući Doma Milorad Živković obavijestio je da je Klub poslanika SNSD-a podnio Prijedlog deklaracije – koju je kasnije preimenovao u Prijedlog rezolucije o odgovornosti. Zatim je pozvao Dom da odluči da li će se predložena rezolucija prethodno razmatrati u nadležnoj komisiji.

Sa 33 glasa "za" (Federacija BiH 23, RS 10), četiri "protiv" i dva "suzdržana", Dom je odlučio da se Prijedlog rezolucije o odgovornosti prethodno razmatra u nadležnoj komisiji.

U uvodnim napomenama predsjedavajući Živković podsjetio je na dopunu dnevnog reda s dva zakona iz oblasti policijske reforme, u nastojanju da se što brže ide s procedurom za ove zakone kako bi BiH što prije ispunila uslove za potpisivanje Sporazuma o stabilizaciji i pridruživanju. Dodao je da je dopuna prihvaćena na Proširenom kolegiju Doma.

Jozo Križanović je, u raspravi i prijedlogu dnevnog reda, rekao da misli da nisu ispunjeni poslovnički uslovi za uvrštavanje dva prijedloga zakona iz oblasti policije, jer mišljenje nadležne komisije još nije dostavljeno poslanicima.

Predsjedavajući Živković odgovorio je da su poslanici dobili mišljenja Ustavnopravne komisije za predmetne zakonske prijedloge, a da je nadležna Zajednička komisija za odbranu i sigurnost jutros zasjedala, da su mišljenja o principima u fazi izrade i da će ih poslanici brzo dobiti na klupe.

Nije bilo više rasprave o prijedlogu dnevnog reda, pa je predsjedavajući Živković konstatirao da 22. sjednica Doma ima sljedeći

D N E V N I R E D

1. Potvrđivanje imenovanja zamjenika predsjedavajućeg, ministara i zamjenika ministara u Vijeću ministara BiH;
2. Prijedlog zakona o Budžetu institucija BiH i međunarodnih obaveza BiH za 2008. godinu (drugo čitanje);
3. Prijedlog zakona o nezavisnim i nadzornim organima policijske strukture BiH (prvo čitanje);
4. Prijedlog zakona o Direkciji za koordinaciju policijskih organa i agencijama za podršku policijskoj strukturi u BiH (prvo čitanje),
5. Informacija o općoj sigurnosti u Bosni i Hercegovini, sa posebnim osvrtom na maloljetničku delinkvenciju (po zaključku sa 21. sjednice Doma);

6. Informacija Vijeća ministara BiH o aktivnostima u vezi sa osnivanjem i radom Komisije za ispitivanje istine o stradanju Srba, Hrvata, Bošnjaka, Jevreja i ostalih u Sarajevu u periodu od 1992. do 1995. godine;
7. Prijedlog rezolucije o spremnosti Bosne i Hercegovine za NATO integracije;
8. Davanje saglasnosti za ratifikaciju Sporazuma između Vijeća ministara BiH i vlada ostalih zemalja učesnica SEECP-a, Misije privremene uprave Ujedinjenih naroda na Kosovu, u ime Kosova, u skladu s Rezolucijom Vijeća sigurnosti Ujedinjenih naroda br.1224.

Ad 1. Potvrđivanje imenovanja zamjenika predsjedavajućeg, ministara i zamjenika ministara u Vijeću ministara BiH

U uvodnim napomenama predsjedavajući je podsjetio na proceduru koja je provedena u Komisiji Doma za pripremu izbora Vijeća ministara BiH. Podsjetio je da je Komisija dostavila Mišljenje koje su svi poslanici dobili te da je dala preporuku Domu da odobri imenovanje zamjenika predsjedavajućeg, ministara i zamjenika ministara u Vijeću ministara BiH. Zatim je predsjedavajući, u skladu s Poslovníkom Doma, pročitao Odluku predsjedavajućeg Vijeća ministara BiH o imenovanju zamjenika predsjedavajućeg Vijeća ministara BiH, ministara i zamjenika ministara.

Poslije čitanja Odluke, predsjedavajući Vijeća ministara BiH Nikola Špirić podnio je Domu izlaganje i obrazloženje Odluke.

U raspravi i replikama u okviru ove tačke učestvovali su: Zlatko Lagumdžija, Sadik Bahtić, Rifat Dolić, Slavko Jovičić, Remzija Kadrić, Momčilo Novaković, Drago Kalabić, Milorad Živković, Denis Bećirović, Milica Marković, Mirko Okolić, Niko Lozančić, Savo Erić, Branko Dokić, Hadži Jovan Mitrović, Šefik Džaferović, Beriz Belkić, Husein Nanić, Bakir Izetbegović i Martin Raguž.

Poslije rasprave, predsjedavajući je predložio da se glasanje o odobrenju imenovanja provede odmah kako bi predsjedavajući, ministri i zamjenici ministara dali i svečanu izjavu, jer neki ministri imaju predviđena putovanja i druge obaveze.

Povodom ovog prijedloga Vinko Zorić javio se za riječ. Rekao je da on nema ništa protiv da se odmah glasa o ovoj tački, ali da je on htio predložiti da se danas glasa odmah poslije rasprave i o svakoj drugoj tački dnevnog reda.

Predsjedavajući je odgovorio da postoji Zaključak Doma o vremenu glasanja, ali da se za ovu tačku pravi izuzetak iz praktičnih razloga. Zatim je dao na glasanje prijedlog da se odmah glasa o odobrenju Vijeća ministara BiH.

Prijedlog je usvojen sa 27 glasova "za" (Federacija BiH 18, RS devet), šest "protiv" i pet "suzdržanih".

Zlatko Lagumdžija upozorio je predsjedavajućeg na odredbu člana 76. stav 2. Poslovnika, po kojoj se Dom prvo treba izjasniti o zaključcima predloženim u raspravi. Lagumdžija je u raspravi predložio sljedeći zaključak:

„Poziva se Predsjedništvo BiH da ponovo imenuje predsjedavajućeg Vijeća ministara BiH pošto je istekao rok za imenovanje ministara i zamjenika ministara predviđen Zakonom o Vijeću ministara BiH (članom 10. stav 1. Zakona propisan je rok od 35 dana)“.

O ovom zaključku, kao i tome da li će se Dom prvo izjasniti o odobrenju imenovanja ili o zaključku vođena je polemična rasprava u kojoj su učestvovali: Zlatko Lagumdžija, Milorad Živković, Momčilo Novaković, Niko Lozančić i Martin Raguž.

Poslije rasprave, Dom se izjasnio o prijedlogu zaključka Zlatka Lagumdžije.

Zaključak nije usvojen – "za" je glasalo šest, "protiv" 30, "suzdržala" su se tri poslanika.

Zatim se Dom izjasnio o odobrenju imenovanja Vijeća ministara BiH.

"Za" je glasalo 29 (Federacija BiH 19, RS 10), "protiv" osam, "suzdržala" su se tri poslanika.

Prema tome, Dom je potvrdio imenovanje zamjenika predsjedavajućeg, ministara i zamjenika ministara u Vijeću ministara BiH, kako slijedi:

- Zamjenici predsjedavajućeg i ministri:

1. Sven Alkalaj, ministar vanjskih poslova,
2. Slobodan Puhac, ministar vanjske trgovine i ekonomskih odnosa,
3. Dragan Vrankić, ministar finansija i trezora i zamjenik predsjedavajućeg Vijeća ministara BiH,
4. Božo Ljubić, ministar komunikacija i prometa,
5. Sredoje Nović, ministar civilnih poslova,
6. Safet Halilović, ministar za ljudska prava i izbjeglice,
7. Bariša Čolak, ministar pravde,
8. Tarik Sadović, ministar sigurnosti i zamjenik predsjedavajućeg Vijeća ministara BiH,
9. Selmo Cikotić, ministar odbrane.

- Zamjenici ministara:

1. Ana Trišić - Babić, zamjenik ministra vanjskih poslova,
2. Vilim Primorac, zamjenik ministra vanjske trgovine i ekonomskih odnosa,
3. Fuad Kasumović, zamjenik ministra finansija i trezora,
4. Veselin Poljašević, zamjenik ministra komunikacija i prometa,
5. Senad Šepić, zamjenik ministra civilnih poslova,
6. Slavko Marin, zamjenik ministra za ljudska prava i izbjeglice,
7. Srđan Arnaut, zamjenik ministra pravde,
8. Mijo Krešić, zamjenik ministra sigurnosti,
9. Marina Pendeš, zamjenik ministra odbrane za upravljanje resursima i
10. Igor Crnadak, zamjenik ministra odbrane za politiku i planiranje.

Poslije izglasavanja odobrenja imenovanja, predsjedavajući, ministri i zamjenici ministara dali su pred Domom svečanu izjavu. Svečanu izjavu nije dao ministar Sredoje Nović zbog opravdanog odsustva sa sjednice.

Ad. 2. Prijedlog zakona o Budžetu institucija BiH i međunarodnih obaveza BiH za 2008. godinu (drugo čitanje)

U uvodnim napomenama predsjedavajući je podsjetio da su u plenarnoj fazi amandmane podnijeli: Momčilo Novaković – četiri amandmana, Zlatko Lagumdžija – devet amandmana, Denis Bećirović – šest amandmana, Klub poslanika SNSD-a - dva amandmana koje brane i jedan kojim osporavaju amandman Komisije i Niko Lozančić - jedan amandman.

Ministar finansija i trezora BiH Dragan Vrankić obrazložio je Prijedlog budžeta, s posebnim osvrtom na amandmane koji su, nakon usaglašavanja s Ministarstvom, usvojeni u Komisiji.

Predsjedavajući Komisije za finansije i budžet Sadik Bahtić govorio je u ime Komisije i obrazložio Izvještaj.

U raspravi su učestvovali: Husein Nanić, Zlatko Lagumdžija, Azra Alajbegović, Lazar Prodanović, Branko Dokić, Drago Kalabić, Momčilo Novaković, Sadik Bahtić, Jerko Ivanković Lijanović, Niko Lozančić, Rifata Dolić, Denis Bećirović, Milorad Živković, Vinko Zorić i Šefik Džaferović. Na kraju je ponovo govorio ministar Dragan Vrankić.

U vrijeme glasanja Dom se prvo izjasnio o amandmanima podnesenim u plenarnoj fazi, redosljedom dostavljanja.

- **Amandmani Momčila Novakovića** (četiri amandmana) nisu usvojeni. "Za" prvi amandman glasalo pet, "protiv" 28, "suzdržana" tri; "za" drugi amandman glasalo je pet, "protiv" 30, "suzdržano" pet poslanika; "za" treći amandman glasalo je 11, "protiv" 26, "suzdržana" dva; "za" četvrti amandman glasalo je pet, "protiv" 28, "suzdržano" sedam poslanika.

- **Amandmani Zlatka Lagumdžije (devet amandmana)** – glasalo se o prva četiri amandmana, pa kako nijedan nije usvojen, Lagumdžija je odustao od ostalih. Rezultati glasanja za četiri amandmana su sljedeći: Amandman 1. - "za" glasalo osam, "protiv" 29, "suzdržana" tri; Amandman 2. - "za" glasalo osam, "protiv" 29,

"suzdržana" tri; Amandman 3. - "za" glasalo osam, "protiv" 29, "suzdržana" tri; i Amandman 4. - "za" glasalo 13, "protiv" 27, "suzdržanih" nije bilo.

- **Amandmani Denisa Bećirovića (šest amandmana)** također nisu usvojeni. Rezultati glasanja su: Amandman 1. - "za" glasalo osam, "protiv" 29, "suzdržana" tri; Amandman 2. - "za" glasalo devet, "protiv" 27, "suzdržana" tri; Amandman 3. - "za" glasalo devet, "protiv" 28, "suzdržana" tri; Amandman 4. - "za" glasalo osam, "protiv" 28, "suzdržana" dva; Amandman 5. - "za" glasalo devet, "protiv" 28, "suzdržana" tri; Amandman 6.- "za" glasalo osam, "protiv" 30, "suzdržana" dva poslanika.

Niko Lozančić i Klub SNSD-a povukli su svoje amandmane.

Zatim se Dom izjasnio o Zakonu o Budžetu, sa Izvještajem nadležne komisije.

Sa 29 glasova "za" (Federacija BiH 19, RS 10), osam "protiv" i tri "suzdržana", usvojen je Zakon o Budžetu institucija BiH i međunarodnih obaveza BiH za 2008. godinu, sa Izvještajem nadležne komisije i amandmanima i zaključcima sadržanim u Izvještaju.

Dom se zatim izjasnio o prijedlogu zaključka koji je predložio Husein Nanić, a koji glasi:

Zadužuje se Vijeće ministara BiH da uradi program/plan aktivnosti na rješavanju smještaja institucija BiH kako bi se umanjili troškovi zakupa.

Zaključak je usvojen sa 35 glasova "za" (Federacija BiH 22, RS 13) i četiri "suzdržana".

Uz zaključke sadržane u Izvještaju Komisije i ovaj proistekao iz rasprave, Dom je, uz Zakon o Budžetu institucija BiH i međunarodnih obaveza BiH za 2008. godinu, usvojio sljedeće zaključke:

1. Obavezuje se Ministarstvo finansija i trezora BiH da, nakon usvajanja Zakona o Budžetu institucija BiH i međunarodnih obaveza BiH za 2008. godinu, uradi instrukcije i distribuira ih svim budžetskim korisnicima radi posebnog praćenja sredstava koja su ranije bila iskazana u programu posebnih namjena, na osnovu čega će se i stavka koja se odnosi na finansiranje rada klubova poslanika-delegata u Parlamentarnoj skupštini BiH u okviru budžeta ove institucije izdvojiti i pratiti kao posebna stavka u iznosu od 495.000 KM.

2. Pri izradi budžeta institucija BiH za 2009. godinu moraju se upoređivati isti pokazatelji (planirani i ostvareni budžeti države i entiteta).

3. Zbog akumuliranih neutrošenih sredstava iz proteklih godina, povlačenja s Jedinственог računa UNO BiH za 2008. godinu ne mogu biti osnovica za izradu budžeta institucija BiH za narednu godinu.

4. Zaduguje se Vijeće ministara BiH da uradi program/plan aktivnosti na rješavanju smještaja institucija BiH, kako bi se smanjili troškovi zakupa.

Ad .3. Prijedlog zakona o nezavisnim i nadzornim organima policijske strukture Bosne i Hercegovine (prvo čitanje) i

Ad .4. Prijedlog zakona o Direkciji za koordinaciju policijskih organa i agencijama za podršku policijskoj strukturi u Bosni i Hercegovini (prvo čitanje)

Predsjedavajući Živković je, nakon osnovnih napomena o ovim zakonskim prijedlozima, predložio da se o njima vodi jedinstvena rasprava.

U raspravi su učestvovali: Bakir Izetbegović, Šefik Džaferović, Vinko Zorić, Šefik Džaferović, Drago Kalabić, Hadži Jovan Mitrović, Branko Dokić, Zlatko Lagumdžija, Azra Hadžiahmetović, Beriz Belkić, Lazar Prodanović, Remzija Kadrić, Jozo Križanović, Sadik Ahmetović, Slavko Jovičić, Momčilo Novaković, Ekrem Ajanović, Husein Nanić, Sadik Bahtić, Selim Bešlagić, Denis Bećirović, Martin Raguž, Adem Huskić, Rifat Dolić, Jovan Todorović, Velimir Jukić i Snježana Rajilić.

U raspravi su iznesena oprečni stavovi o prijedlozima zakona, od onih koji zastupaju stav da nisu ispoštovana tri evropska principa, do onih koji daju podršku predloženim zakonima i smatraju ih jedino mogućim u ovom trenutku.

Nakon duge rasprave, Dom se izjasnio o prijedlozima zakona u prvom čitanju.

- Prijedlog zakona o nezavisnim i nadzornim organima policijske strukture Bosne i Hercegovine usvojen je sa 22 glasa "za" (Federacija BiH 13, RS devet), 16 "protiv" i dva "suzdržana".

- Prijedlog zakona o Direkciji za koordinaciju policijskih organa i agencijama za podršku policijskoj strukturi u Bosni i Hercegovini usvojen je sa 22 glasa "za" (Federacija BiH 13, RS devet), 17 "protiv" i jednim "suzdržanim".

U jednom dijelu rasprave predsjedavajući je održao konsultacije sa predsjedavajućim klubova poslanika radi dogovora o daljnjem radu sjednice, s obzirom na njeno dugo trajanje i preostale tačke dnevnog reda. Dogovoreno je da se 22. sjednica završi razmatranjem ovih tačaka, a da se preostale tačke uvrste u dnevni red naredne – 23. sjednice Doma, koja će biti održana 5. 3. 2008. godine.

Ovim je, u 19,55 sati, završena 22. sjednica.

Sastavni dio Zapisnika je transkript 22. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Milorad Živković